



Ruthy Vrieswijk-Bergen:

Bon Dia yen di alegriaaa!

ORANJESTAD - Nos a topele diadomingo anochi na Paseo Herencia. El a hurk casi hinca rudia pa a para banda di Lulu, e precioso nieta di Vale Croes, nos comediante number 1, awe den feliz memoria.

E kier a comunica cu Lulu riba Lulu su nivel di un mucha spiertu di apenas 6 año di edad. Tawata e anochi dedica na Vale Croes dfin y su famia, cu desvela di e cara relief di Vale. Ora Angelique Stuger a hurk, dobla su rudianan pa ta na e altura di Lulu, mi wowonan a yena cu awa, mi gemoed a yena. Mi amiga Angelique 'Angie' manera mi a cuminsa yam'e, ta un hende muhe hopi halto mes di estatura, pues pa a wak e na

altura di Lulu a demostra un biaha mas su curason grandi yena di amor y aprecio cu Angie tin pa Don Vale Croes su talentonan como nos comediante number un di Aruba y su famianan.

Angelique a papia palabranan hopi bunita cu a emociona nos tur. Un otro banda di e hende muhe bunita, fuerte y simpatico aki sigur! Pero e sra. dama grandi den estatura aki sa papia hopi cos pret tambe, locual el a haci den su Stand up Comedy show recientemente den Crystal Theater. Su One woman show Stand Up Comedy a tuma lug a dia 27 di october ultimo y e publico presente a gosa un mundo di su presentacion gracioso, su jokes nan, su canto y su bunita bailenan.

Un elenco di artistanan cu tambe ta gusta expresa e dushi alegria! Lady Ruth tambe a gosa un mundo di su show, y nos tambe a hari di cum-



insamento te fin! Di berdad, ora mi a corda riba mi mesun show, mi a bin ta realisa mas cu esta un curashi Angie tin! Di papia y actua, di actua y papia su cosnan pret. Su show e mesun atardi ey, spe-

cialmente pa nos grandinan, tambe a cay na hopi bon tera. Tur a bay cas na harimento! Y mas bo hari, menos lachi bo tin na bo cara!

E pareha cu a wordo casa sin spera a bay cas sigur cu sintimentonan pret kisas tambe mixto, pasobra por haci joke di casamento, pero ta algo serio e ta toch. Nan tawata hopi sportief mes y a hunga cu e wega dushi aki. Oh y e cantica 'Deooooo' cu nan a baila hot hot hot ! Si, Angelique su bailadonan a demostra cu nan sa baila y e cabayero boluntario den publico cu tawata tin e curashi pa a bay baila cu e strea di e anochi ey, tambe a ricibi su aplauso.

Angelique mes a cose tur su kostuum nan y e mes a hinca tur su show den otro cu tur e tokenan special humoristico. Ora nos a felicitele cu su tremendo show y su baile di Deooo, e di, cu ta despues e lo bay ripara si su lomba lo haci un crenchi dolor, pasobra el a lora bira baila pio

cu un colebra! Y no yama mi amiga Angie 'macamba', pero por yamele si 'arucamba', pasobra e ta stima Aruba masha masha hopi mes. Un di su mayornan ta Hulandes y e otro ta Rubiano.

Naaaaah, locual Angelique Stuger a haci, ningun otro comediante femenino a yega di haci aki na Aruba! E ta manera nos ta bisa na Hulandes crioyamente: 'Enig in haar soort', cu su curason grandi yen di amistad bunita pa tur cu ta cordele y tur cu a apoye algun año pasa como Mrs. Carnaval, na unda tambe el a steal the show! E sa di uza su talentonan pa trece alegria! Nos ta super proud di bo lieve Angie, 'You did it again!' and you will do it again! Masha masha pabien cu bo exitoso Stand Up Comedy show! Be you always! Bo tin un curpa grandi elegante y bunita, y bo tin un curason grandi y bunita! Nos ta stima bo!!!! Danki pa tribi bin cu bo Stand Up shownan pa alegra e curasonnan! God bless you!!!!

